

國朝先正事略

國朝先正事畧卷十三 名臣

平江李元度次青纂

鄂文端公事畧

公諱鄂爾泰。字毅庵。姓西林覺羅氏。滿洲鑲藍旗人。曾祖圖們。天聰中從征大凌河。戰歿。祀昭忠祠。父鄂拜。官祭酒。公以康熙三十八年舉人。授三等侍衛。從

聖祖獵。和詩稱旨。遷內務府員外郎。郡王某至。暴抗也。屬公事不應。召公將杖之。公袖匕首見曰。士可殺。不可辱。王敬其強直。謝之。雍正元年。典雲南鄉試。特擢江蘇布政使。康熙末年。搢紳橫甚。抗稅。旅距小民。公用能吏趙向奎等。一大創之。設春風

亭招致文士大將軍年羹堯勢方張遣奴至蘇巡撫啟中門迎之來見公公高座召入問爾主安否奴見公甚莊嚴不得已屈膝出年亦無如何八月遷廣西巡撫三年署雲貴總督四年夏貴州狎苗負險肆逆議撫久無成公奏欲百年無事非改土歸流不可欲改土歸流非大用兵不可宜悉令獻土納貢違者剿疏上盈廷失色

世宗大悅曰此奇臣天賜朕也命公進呈生年月日與怡賢親王赴養心殿手鑄三省總督印付公遂實授總督公分三路進剿一由谷隆一由焦山一由馬落孔焚其寨七進克長寨羊成堡又以鎮遠土府刁辭霑益土州安於藩凶詐計擒之尋奏

狎苗及川販窩黨悉就擒

上嘉其受速。命優敘。條上經理狎苗事宜十一則。皆報可。先是四川烏蒙土司祿萬鍾擾東川府。與滇接壤。公奏改東川隸滇。從之。命同川督岳公鍾琪辦理烏蒙事。萬鍾不就撫。至是檄總兵劉起元整兵直入。各寨皆投誠。萬鍾遁。鎮雄復潛投四川。五年春被獲。其黨鎮雄土司隴慶侯亦赴川。繳印獻土。詔給公騎都尉世職。會鎮沅猺賊戕官焚掠。剿平之。獲賊首刁如珍等。又廣西土府岑映震淫虐。公奏明懲治。映震惶懼。乞改流存祀。七月。會剿謬冲花苗。擒其渠餘眾。歸順。九月。擒威遠猺賊札鐵匠。降新平賊李百壘等。十一月。招撫長寨後路生苗百八

十四寨得旨嘉獎授一等輕車都尉十二月攻破雲南猺賊窩泥種地方六千餘里劃界建城設員弁有詔優敘公知人善任賞罰明肅一時麾下文武如張廣泗張允隨哈元生元展成韓勳董芳等各以平苗立功致身通顯然土官自漢唐世襲二千餘年雄富敵國一旦入版圖受官吏約束心終不甘諸漢奸又陰嗾之改流後反者歲數起蜀之烏蒙窩泥滇黔之泗城長寨車擺夷粵之西隆州相繼騷擾公慙怒次骨奏請褫職討賊贖罪。

世宗以爲多一次變動加一次平定優詔不許公感

上恩益奮親督軍鏖戰所獲苗皆剗脇截脰分掛崖樹幾滿見

者股栗。繳上苗寨鎗礮軍械無萬數。自丙午用兵。至庚戌功成。乃造橋雲貴交界處。曰庚戌橋。開通滇黔路八百餘里。孟養苗者與老撾國連界。明正德間嘗作亂。兵部尙書王驥帥師十二萬平之。立石金沙江。羣夷驚從。古未有然。歸後又叛。至公而安營。設汛如內地矣。嘗親巡三省窮邊六千餘里。諸頭目燭香跪伏迎道。左南詔諸國遣使上表獻方物。皆離中原萬里者也。新開古州丹江禾長八尺穗雙歧。豆如栗子大。

世宗批劄云。朕實感謝矣。不知如何待卿而後心安。尋命加少保。公奏新開苗疆立營設官事宜十則。皆如議行。八年八月。烏蒙猺賊結涼山等蠻復叛。總兵劉起元被害。祿萬鍾從弟萬

福亦與賊合。公飭諸將進討。參將韓勳大敗破於奎鄉。總兵哈元生復烏蒙。同攻克大川。十二月擒萬福。兇渠盡獲。諭嘉公平時節制封疆。以公忠表率官僚。以義勇訓練將士。而臨機應敵。復調度有方。用能迅奏膚功。若此。公以先事疏防。引過自責。屢奏不居蕩寇之功。詞甚懇切。詔曲從所請。以成其謙抑之美。九年疏陳烏蒙善後事宜八則。從之。十年正月。陞見拜保和殿大學士。兼兵部尙書。軍機大臣。封一等伯。世襲罔替。時大軍進剿準噶爾。命督巡陝甘經畧軍務。賜金甲上方劍。出巡阿爾蘇。疏上屯田事宜。歸奏西夷未可卒滅。擾敝中華。無益會果親王從西藏歸。與公言同。

世宗遂罷兵與天下休息公受

世宗非常之知入朝盡三鼓方出語秘外莫能知每具一疏雖請安慶賀極尋常劄子

上必嘉獎忠誠頒示天下嘗云朕有時自信不如信鄂爾泰之專事無大小必命鄂爾泰平章以聞公亦以身殉國知無不爲一切形迹嫌疑無所避重門洞開賓客車馬廡集漏盡乃已督三省時大興水利滇之昆明海口黔之磁硐八達粵之楊林諸河俱宣流貫行商舶麇至貴州布政使申大成請軍田加稅將軍鄂彌達請丈欺隱田部議允行公惡其言利皆奏寢之尤護持善類滇督高公其倬楊公名時獲罪楊聽勘而高修城新撫

朱綱欲入楊罪呼三木以待軍民洶洶欲爲變公皆力持之嘗從容語綱曰過湯陰岳忠武廟會見鐵人乎綱大慙阻楊公夜夢羣蜂攢囓一神人以袖揮之散及見公如夢中貌黔撫何公世璠以名儒爲糧道李日更所劾公昭雪之合河孫公嘉淦被誣坐贓據以入告者親王也公見

上曰孫某性或偏執若操守臣敢以百口保之卽命公弟鄂

爾奇一訊而事白經畧歸

上命戶部尙書海望爲治第凡什物櫺禁盤匱械審之屬必具已報齊矣命昇堂上兒視之以爲竄欺大怒召海切責海叩頭請易乃已及公入朝奏事畢

上曰。卿勿還舊居。可卽赴新居。手書公忠弼亮四字。賜之。侍衛十人。捧而隨。公入。聞府中無園囿。命以藩邸小紅橋園。賜公。而中分其半爲軍機直廬。公弟鄂爾奇。以兵部尙書兼步軍統領。公力爭不可。

上曰。卿慮而弟反耶。公叩首曰。兵權太重。非制也。十三年夏。臺拱逆苗叛。公自以從前等輩未周。具疏請罪。且斥削伯爵。優詔如所請。命仍畱三等男。

世宗晚年。召公宿禁中。逾月不出。人皆不測。上意八月二十三日。夜。

世宗升遐。召受顧命者。惟公一人。公慟哭捧遺詔。從圓明。

園入禁城。深夜無馬駒。煤羸而奔擁。

高宗登極。宿禁中七晝夜。始出人。驚公左袴紅濕。就視之。髀血涔涔。下方知倉卒時爲羸所傷。虹潰未已。公竟不知也。尋詔同莊親王允祿。果親王允禮。及大學士張廷玉。總理事務。晉爵一等子。乾隆元年。典會試。充三禮義疏。及文穎農書各總裁。八月。查永定河道還朝。命爲軍機大臣。兼領侍衛內大臣。十二月。晉三等伯。賜號曰襄勤。公嘗言。楊公名時。猶古器。不可瓦缶用。至是。楊公內召。及抵京。奏公處置苗疆非善。後策公初不以爲忤。及楊公捐館。公經紀其後事。哭之哀。三年。兼議政大臣。四年。充經筵講官。河督高斌請開新運口。論者以爲不便。詔

公往關視。公酌地勢議覆從之。又言河工機要三事。一天然二
埧不宜開。免湖水全洩。並興化鹽城等縣水患。一毛城舖埧已
經變遷。宜酌復。一河勢宜取直。兼放淤培岸。省埧埽費。下九卿
議行。五月。加太保。充玉牒館總裁。七年。副都御史仲永檀以密
奏畱中事洩於公子鄂容安。公坐降二秩畱任。八年。兼掌翰林
院。十年正月。以疾乞解任。

上慰畱。三月。加太傅。四月薨。得旨。大學士伯鄂爾泰。公忠體
國。直諒持躬。才裕經綸。學有根柢。不愧國家之柱石。文武之儀
型。不意一病不起。朕心深爲震悼。其輟朝二日。親臨祭奠。昔
皇考有配饗。

太廟遺詔著所司遵行。並入祀賢良祠。加祭二次。尋賜祭葬。諡文端。公方頤廣顙。鬚髯若神。色溫而語莊。面兼春秋二氣。性明決。威重。勇於任事。好獎勵名節。惡儻合取容以媚世者。及爲相。益自任進賢。退不肖。士有學行者。多以禮進之。雷君鉉。莊君亨陽。任君啟運。公皆知其名。欲一見。屬朱高安方望溪道。意皆謝。不敢往。公禮先焉。及公病。雷君往視。坐榻前。公問人才。雷舉所知以對。公曰。是皆常往來於吾心者也。烏虜卽此。可以見公之爲人矣。所著有西林遺稿。二十年。甘撫鄂昌。與詩詞悖逆之。胡中藻唱和。削籍治罪。中藻公門生。鄂昌公姪也。命撤出賢良祠。四十四年。

御製懷舊詩列公五閣臣中子六長鄂容安自有傳

張文和公事畧

子若霽

若澄

若淑

勤恪公若淳

乾隆二十年三月二十日。子告大學士桐城張公考終里第。遺疏入。謚曰致仕大學士張廷玉。懋事。

三朝。宣力年久。勤勞夙著。受恩最深。前以其年屆八旬。特加體恤。許令退休。實朕優念老臣本懷。至於配享。

太廟。係奉。

皇考遺詔遵行。非爲臣子者可以要請。及朕賜詩爲券。又不親赴宮門謝恩。自不得不示薄譴。用申大義。今遽聞溢逝。皇考之命。朕何忍違。且張廷玉在。

皇考時。勤慎贊襄。原屬舊臣。宜加優恤。應仍謹遵。遺詔配享。

太廟以彰我國家酬獎勤勞之盛典尋賜祭葬如例謚文和
本朝百餘年未有漢文臣得與配享者非常之典公獨當之於
戲盛矣公字衡臣一字硯齋太傅文端公英仲子也康熙三十
九年進士選庶吉士授檢討直南書房愛知

聖祖游加優擢由洗馬五遷至刑部右侍郎充經筵講官六十
年調吏部左侍郎當是時公以名相子迴翔卿貳文學經濟已
歸然負台輔望矣明年

世宗御極卽命公協同翰林院掌院學士供几筵祭告文
字初政殷繁諭旨日數十下公承命應奉精敏詳贍悉稱
旨十二月擢禮部尙書雍正元年奉命爲諸皇子師加太

于太保兼掌院學士充經筵日講起居注官轉戶部尙書御製詩賜之有大政資經畫許談待討論之句三年署大學士事四年拜文淵閣大學士兼管戶部翰林院事明年晉文華殿大學士又明年晉保和殿大學士兼署吏部尙書七年晉少保方是時西北兩路用兵

上以內閣在太和門外僦值者多虞泄漏始設軍機處於隆宗門內爲承旨出政之總匯公與鄂爾泰公同爲軍機大臣諸格式皆公所奏定也軍機職掌在恭擬諭旨凡內外臣工所奏皆面取進止明發上諭其有旨敕議者審可否以聞凡明發諭旨皆下內閣以次及於部科若指授兵畧誥誡臣

工及查核刑政之失當者爲寄信。上諭密封交兵部馳遞。自
立軍機處內閣之任遂輕內而部院寺監暨九門提督內務府
外而各直省督撫學政提督總兵官鹽政權使各將軍參贊辦
事大臣迄四裔諸屬國有事無不綜彙又無日不召對

上所巡幸無不從而四方章奏亦皆以摺代本逕達軍機處其
內閣本章率依例題達而已甚或內閣翰林院撰擬有弗當亦
下軍機處審定故本朝軍機大臣之任最爲繁重焉八年夏
秋閒

聖躬違和十月始愈詔獎公及蔣公廷錫贊襄機務公正無
私周詳妥協數月中得以靜養調攝者皆賴翊贊之力各賞輕

車都尉。仍各加二級。十一年。詔以文端公從祀京師賢良祠。復卽家。賜祭一壇。命馳驛回籍。舉行典禮。賜帑金萬兩。爲祠宇。祭祀費。御製祠聯。並賜冠帶衣裘及貂皮人蔭等物。頒內府書籍五十二種於其家。先期一日。

上賜玉如意曰。願爾往來事事如意也。公行經直隸。疏言水災甚重。請敕督臣確查。加賑一月。再查地方應修工程。以工代賑。得旨允行。時公子若霽成進士。特授編修。而公弟禮部侍郎廷璠督江蘇學政。皆給假襄事。一門之內。朝紳命服輝映。閭里海內榮之。明年二月回京。

上遣內大臣戶部侍郎海望迎勞於蘆溝橋。賜酒膳。十三年。

八月

世宗龍馭上賓。遺命與莊親王、果親王、大學士鄂爾泰公總理事務。且詔他日以公配享

太廟。

高宗卽位。倚任有加。賜爵三等子。尋以公所領事多。不必兼管翰林院。乾隆元年奉命爲皇子師。仍兼管翰林院事。充經筵講官。時車駕親謁。

景陵。公與王大臣留京。總理事務。自是每巡幸。畱公總理。以爲常。三年。

上將視學。以三老五更之禮可行與否。詢軍機大臣。公疏言。

更老之名。雖見於禮經。但上有所施。必令臣下有可受。如所云天子袒而割牲。執醬而饋。執爵而酌。如特行此禮。度臣下誰敢受者。漢宋均曰。三老乃老人。知天地人之事。五更乃老人知五行更代之事者。夫上通天文。下徹地理。中察人倫。得一已難矣。況兼之乎。至五行更代。如伏羲以木德。王炎帝以火德代之。黃帝又以土德代之之類。此非學究天人。能知其所以然乎。考漢以李躬爲三老。桓榮爲五更。魏以王祥爲三老。鄭小同爲五更。周武帝以于謹爲三老。其時五更無人。若而人者。果克副其名。而無愧乎。先儒胡寅譏桓榮僅能授章句。不知仲尼修身治天下之大道。是桓榮猶不免譏評。下此何足以當鉅典。竊思樂記

祭義文王世子諸篇。雖有三老五更之名。然不言何代。如謂虞夏商周皆然。則尙書及官禮。何以不見此目。疑係漢儒附會。是以唐宋迄。本朝千有餘載。此禮未曾舉行。蓋以名實難副。儻有幾微。未愜觀聽。豈不褻至尊而羞大典乎。臣愚以謂此舉。應停止不必。敕下廷議疏入。

上繼其言。尋進爵三等勤宣伯。四年。加太保。九月九日。公七十七生辰。

上於木蘭行在。賜詩爲壽。又賜聯曰。潞國晚年猶矍鑠。呂端大事不糊塗。遣內臣賁酒筵以賜。前後賞賚。賜第賜園。賜乘肩輿入紫禁城。至不可勝紀。八年。

上念公篤老。命不必嚮早入朝。遇炎蒸風雪。亦不必勉強。內直九年冬。重葺翰林院落成。車駕臨幸。賦詩宴賚。謂公與鄂公曰。二卿真不愧古之房杜。十一年。公長子內閣學士若霽病故。諭令節哀自愛。以公直內廷。需人扶掖。特命其次子庶吉士若澄在南書房行走。十三年。以老乞休。溫旨慰留。且諭曰。卿受兩朝厚恩。且奉

皇考遺命。將來配享。

太廟。豈有從祀元臣。歸田終老之理。公奏言。宋明配享之臣。曾有乞休得請者。因舉數人爲證。且稱七十懸車。古今通義。又引老子知足不辱。知止不怠爲解。諭以爲不然。謂昔人久處要

地恐滋讒謗。將至迫於殆辱。故易云見幾而作。要豈所論於與國咸休。視君臣爲一體者哉。夫同堂聚處之人。一旦遠離。雖朋友尙不忍。況在君臣。書曰天壽平格。又曰耄壽俊在厥服。秦穆霸主尙猷詢茲黃髮。使七十必令懸車。何以尙有八十杖朝之典。卿精力不減少壯。若必以泉石高蹈爲適。獨不聞武侯鞠躬盡瘁之訓耶。公奏言武侯遭時艱難。受任軍旅。與生逢熙治優游太平者不同。諭復以爲不然。謂泉夔稷契與龍逢比干。可信其異地。皆然。時不同而其心同也。泉夔稷契無龍逢比干之心。必不能致謨明弼諧之盛。龍逢比干無泉夔稷契之心。亦必不能成致命遂志之忠。遭遇雖殊。誠盡則一。夫旣以一身在天

下之重。則不以艱鉅自諉。亦豈得以承平自逸。爲君則乾乾不息。爲臣則蹇蹇匪躬。所謂一息尙存。此志不容少懈。朕爲卿思之。不獨受。

兩朝至優至渥之恩。不可言去。卽以朕十餘年眷待之隆。亦不當言去。朕嘗謂致仕之說。必古人遭逢不偶。不得已之苦衷。爲人臣者。斷不可先存此心。何則。朝廷建官命職。不惟逸豫。惟以治民。而人生自少至老。爲日幾何。且筮仕之年。非能自必。設預以求去。爲心將膜視一切。泛泛如秦越人之相視。年至則奉身以退耳。誰復爲國家出力者。此所繫於國體官方人心世道者。甚大。故不可以不辨。尋舉所 諭宣示朝列。并 命公不必兼

管吏部俾從容內直。以綏眉壽。又命解監修總裁之任。以大學士傅公代之。十四年。復諭曰。大學士勤宣伯張廷玉。自皇考時。簡任綸扉。朕御極以來。弼亮寅工。久近一致。允爲國家祥瑞。但恭奉

遺詔配享

太廟。予告歸田。誼所不可。昔宋臣文彥博。十日一至都堂。議事節勞。優老。古有成謨。大學士紹休。世緒生長京邸。今子孫繞膝。良足娛情。原不必以林泉爲樂也。可。四。五。日。一。入。內。廷。備。顧。問。城。內。郊。外。皆。有。賜。第。可。隨。意。安。居。從。容。几。杖。頤。養。天。和。副。朕。眷。待。耆。俊。至。意。且。令。中。外。諸。臣。共。知。國。家。優。崇。元。老。恩。禮。兼。隆。而。

臣子無可已之日。自應鞠躬盡瘁。益加勸勉盡職。賜御製詩一章。有勸茲百爾。應知勸莫羨東門祖道輪之句。公自是不敢言去。是年十一月。

上見公老態益增。優詔許原官致仕。俟來春冰泮。舟行旋里。且諭南巡時。即可相見。至朕五十正壽。大學士亦將九十。輕舟北來。扶鳩入覲。豈非堂廉盛事。御製詩三章。賜之。有句云。擬問蘭陵二疏傳。可曾廿四考中書。又云。指日翠華臨幸處。歡顏前席問農田。命內廷諸臣和韻。以寵其行。公至是登朝垂五十年。長詞林二十七年。主揆席二十四年。凡軍國大政。承旨商度。恪勤匪懈。造膝對揚。率移晷漏。其所籌畫。非可以一事。

名非可以形迹數觀雍正以來數十年間吏治肅清人民樂業
沐

三聖涵濡之澤而公雍容坐論極人世遭逢之盛則其慎密周
詳所以翊贊聖謨者可想見其概矣公典領機要朝廷大
制作多出公手修

三朝實錄玉牒會典治河方畧國史明史諸書皆爲總裁自
康熙丙戌迄乾隆丁巳與分校者三主順天鄉試者一主會試
者三廷試朝考皆公首爲閱擇一以公慎將之佐司寇時
山東鹽販糾眾爲不軌青州民倡邪教有司捕繫百五十餘人
株連未已公奉命出按戮七人遣三十五人而讞定在吏部

絕苞苴杜請託銓政肅然。浙江江西界連閩廣流民入深山種
麻結茅以居號棚民不隸州縣爲良民害公請編戶籍行保甲
消慝弭患至今帖然嘗條奏愼刑二事一刑部遇各衙門送犯
不論事之大小犯之首從俱收禁致累無辜請分別收禁取
保如外省例一刑部引律例往往刪去前後文止摘中間數語
卽以所科之罪承之甚有高下其手影射比擬者請令都察院
大理寺駁正扶同草率先罪之疏皆下九卿議行又令甲婦人
年三十以內守節至五十者得旌公建議以未五十而卒者乃
享年不永非守志不終請以守節至十五年者一體旌表著爲
令翰林爲培才地公有所薦舉卽擢用終不使其人知諸所陳

奏雖家人子弟不得以閒請也。方公之致仕也。召見時奏及配享事。謂上年奉有從祀元臣不宜歸田終老之諭。恐身後難邀異數。外閒亦有此論。免冠叩首請。

上一言以爲券。

上問外閒議論爲誰。公對史貽直卽有此論。

上知公素與史公不洽。遂允特頒諭旨。並賜詩以安其心。

翼曰。公當入謝。適大風畏寒。恃恩眷有素。令仲子若澄齋摺。

奏謝。未親詣宮門。

上末憚將傳旨詰問。次日公早至。

上疑軍機處有洩漏者。屢降旨切責下廷臣議奏。且曰。張廷

王之罪。固在於不親至謝恩。尤在於面請配享。其面請之故。則由於信朕不及。廷玉事朕十有四年。朕待羣臣。事事推心置腹。而伊轉不能信。忍爲要挾之求乎。廷議以公大不敬。請奪爵職。畱京待罪。公具疏引罪。有旨。削伯爵。以大學士原銜休致。瀕行。賜御製詩。手書二卷。御用冠服數珠。如意等物。派內臣往送。家居六年薨。壽八十有四。旣薨。仍得與侑享之典。

聖主優老成全。國體可謂恩禮始終矣。公性孝友。子姓戚黨列仕籍者數十人。皆約以禮法。在政府無一字與督撫外吏接。凡餽禮值百金。輒峻卻之。生平無聲色玩好之嗜。退食泊然。無所營。時手一編。安坐室中。閤若無人。僚友共事者閱數十輩。平

心接之多所容納。人不見其有疾。言遽色。康熙丙戌分校禮部試。同事以微詞相探。因作闌中對月詩。有云。簾前月色明如晝。莫作人閒。暮夜看其人。覽之慙而退。其不惡而嚴多類此。四十四年。御製懷舊詩。列公五閣臣中。五十年。御題公三老五更議。嘉公持議甚當。命與御製三老五更說。並勒辟雍碑。以不沒其善。著有傳經堂集。焚餘集。澄懷園文存。子四。長若靄。雍正十一年進士。廷試卷進呈。

世宗命內侍傳諭公曰。爾子張若靄取中探花矣。公請面對。免冠叩首曰。臣家世受皇恩。無所不極。其至臣子若又占科名最高之選。臣實夢寐難安。願讓與天下寒士。

上乃宣諭曰。殿試進呈卷。朕閱至第五本。語極懇摯。有古大臣風。因拔置一甲三名。及拆號。乃大學士張廷玉子張若靄。朕深嘉悅。蓋大臣子弟。能知忠君愛國。異日必爲國家宣力。大學士張英立朝數十年。清忠和厚。終始不渝。張廷玉朝夕在朕左右。時時以堯舜期朕。朕亦以皋夔期之。張若靄稟承家教。兼之世德所鍾。故能如此。非獨家瑞。亦國之慶也。因遣人往諭廷玉。乃廷玉再三懇辭。情詞懇至。朕不得不勉從其請。將若靄改二甲一名。以表大臣謙謹之誠。並昭國家制科盛事。五月。授編修。十三年。入直南書房。乾隆二年。遷侍講。累遷內閣學士。十一年。高宗西巡。若靄扈從。以病回京卒。優旨悼惜。以曾襲伯爵。加

恩照伯爵品級賞白金千兩治喪。賜祭一次。次子若澄乾隆十年進士。改庶吉士。命直南書房。十二年授編修。累遷內閣學士。三子若淑官郎中。少子若淳由貢生捐主事。直軍機處。累遷郎中。乾隆三十年知澄江府。擢建昌道。入爲太僕少卿。再遷通政使。五十一年授內閣學士。疏請申伐蛟之令。并請下陸中丞燿所著甘薯錄於江浙諸路。令其學種。以備荒。尋扈蹕避暑山莊校射。中的者二。賞戴花翎。五十四年遷工部侍郎。調刑部。兩赴陝西勘獄。嘉慶元年命兼管順天尹。五年擢兵部尙書。仍管順天府事。賞紫禁城騎馬。未幾調刑部。七年薨。贈太子少保。賜祭葬。謚勤恪。長子曾誼官至浙江按察使。

福文端公事畧

公諱福敏字龍翰號湘鄰姓富察氏滿洲鑲白旗人康熙二十六年進士選庶吉士散館以知縣候銓

世宗皇帝在藩邸時

純皇帝初就傅命公侍讀及

世宗御極擢內閣學士兼禮部侍郎充經筵講官雍正二年充會試副考官教習庶吉士三年遷吏部右侍郎八月署浙江巡撫疏言海塘工程原議皆用條石後因限迫遂用條石托外亂石填中恐日久坍塌請寬限照原議改築得旨交新撫李衛查勘修理時

上命都統拉錫赴浙。簿錄年羹堯貲產。羹堯將書札先自焚燬。公於拉錫回程後。查出西征隨筆逆書二冊。係錢塘舉人汪景祺撰。

上嘉其細心。諭景祺如律四年。擢左都御史。兼掌院學士。九月。署湖廣總督。十月。奏沔陽潛江等十州縣水災。請借常平倉穀六萬石發賑。續將盈餘銀買補。又奏被水各州縣現遵 旨煮賑。但老幼頗難就食。丁壯亦覺路遙。時當種麥。恐妨生業。請查丁口一體給米。均得 旨嘉獎。尋 賜璽書曰。朕原命爾暫署督篆。若得一人。卽命往代。近日滿臣中頗乏人。皇子左右亦須爾來輔翼。爾在楚。乃出於萬不得已。宜體朕意。勉爲之。五年。

奏請以耗羨銀兩築江陵松滋等縣隄岸。奉旨著動帑金委員監修。成後仍算民隄。百姓加意保護。俾永受其益。四月謬紳花苗叛。公檄黔兵截後路。以楚兵搗巢。平之。下部議敘。七月疏言安陸荊州被水。各隄值冬初水退。正可興工。除被災老幼婦女照常賑濟外。其丁壯悉令修隄。優給賑米。俾飢民得食而隄亦完固。

上嘉其議。如所請行。先是閏四月召公回。至是始得代入京。授吏部尙書。六年以前撫浙江時。贍徇布政使佟吉圖擅動庫銀。事落職。八年夏命協理兵部侍郎兼戶部侍郎。擢左都御史。仍兼戶兵部事。十年署工部尙書。特命協辦大學士。旋署

刑部尙書。十二年以審理尙書彭維新一案朦混徇隱。奉旨申飭。乾隆元年。命同左都御史孫嘉淦辦廢員案。孫劾公偏執。

上以福敏既拘執。嘉淦亦沽名。另派大臣辦理。尋典順天鄉試。明年典會試。敎習庶吉士。三年擢武英殿大學士。兼工部尙書。掌院學士。四年加太保。六年七月。

上初幸木蘭行圍。公條奏事宜。一行圍邊外。內外章奏。按期馳送。較。宮廷清穆。勞逸懸殊。尤當。朝。乾。夕。惕。清明在躬。從容應之。一畱京百官。道在隨事警察。因人懲戒。不使偷惰者得行其私。一巡行之日。言路不可不開。然有大奸惡。大利害。斯宜參奏。

不當瑣細瀆陳傷政體一

聖祖皇帝於獵地平易險阻無不了然故周旋中度馳射如神願

皇上籌度於馳射之先一弁兵布圍未必無參差乞少加從容俾得踴勉從事一弁兵從行日久必至資斧不繼量加恩澤費無多而受惠無窮得旨覽奏具見老成忠懇補袞陳善之意朕皆嘉納七年公壽七十御製詩賜之曰前世文昌宿當朝王者師典型鸛鷺序標準鳳凰池久賴經綸手猶疏弟子儀壽身兼壽世長佐太平基八年奏時政三條一河防事宜動關呼吸難容遲滯江南石林口等處新工初就尤宜保護懇照

災民請賑例。一面辦理。一面奏聞。一災民勢必流移。自謀生活。若有司不善拊循。禁使不得越境。必至輾轉溝壑。宜加以玩視。罪。一江南湖廣等處偏災。請畱六省。南漕賑濟。懇宸斷數目。截畱。庶上不虧儲。下足濟食。奏入。報聞。十年冬。以疾請解任。手詔曰。卿才品優長。老成端諒。內廷講誦多年。恪慎小心。特簡綸扉。正加眷倚。覽奏情辭懇切。勉從所請。着解任調理。加太傅銜。以示篤念舊學至意。卿善自頤養。以承恩澤。遇精神康健。風日晴和。仍詣宮門請安。並到內廷書房看視。十二年。

上以詩存問曰。經時未到禁門邊。食履多宜心泰然。月霽風清煩暑遠。忽教重憶講幃前。十七年公壽八十。御製詩賜之。

有還丹益算何須藉。兩字傳經永不刊之句。二十一年十月以疾薨。先是公前歲抱疴。

上親臨看視。賜以醫藥。至是得遺疏。深爲震悼。卽日親行致。

奠。並賞內庫銀千兩治喪。應得卹典。下所司察例具奏。尋

賜祭葬。諡文端。入祀賢良祠。公嚴氣正性。懍不可犯。及習與之處。開心吐懷。廓然無城府。自言通籍數十年。所自信者。骨性鯁直。不脂韋。至老猶存故我耳。直內廷。與蔡文勤雷翠庭善。尤服膺。高安朱公曰。此吾心之師也。後進有言論相左者。始或變色。事後保任。旋及之。旣罷相。語翠庭曰。此位豈易稱。我浮沈其間。君心不我嗤耶。晚好讀周易觀象曰。安溪若在。縱不納我。拜亦。

當稽首門外耳。四十四年。御製懷舊詩。稱爲龍翰福先生詩。曰。今古旣殊宜。其教亦異施。古方教數年。今爲出閣時。憶年舞勺歲。

皇考掄賢師。卽從師授經。詎惟習少儀。循循旣善誘。嚴若秋霜。披背誦自幼敏。匪曰詡徇齊。日課每速畢。師畱爲之辭。以此倍多讀。忠益平生資。誰知童時怨。翻引老日悲。不失赤子心。能無繼繼思。嗚呼於先生。吾得學之。六十年二月。諭曰。本月上丁釋奠禮成。因念臨御六十年以來。孜孜勤政。悉由典學懋修所致。回憶冲齡就傅時。久侍講幃。敷陳啟沃。福敏蔡世遠兩師傳之力爲多。今朕年當八旬開五。眷懷舊學。尤宜增秩三公。

學士太傅福敏。可晉贈太師並賜祭一壇。用示朕崇禮師儒至意。

兆文襄公事畧

公諱兆惠字和甫姓吳雅氏滿洲正黃旗人父諱佛標官都統
雍正九年公由筆帖式入直軍機處補內閣中書三遷至內閣
侍讀學士晉內閣學士乾隆七年擢盛京侍郎調刑部右侍郎
授副都統及護軍統領十三年秋詔赴金川軍營督辦糧運
明年二月請同哨探兵進剿命留烏里雅蘇臺辦事充領隊
大臣十一月調赴西路巴里坤辦事時準部阿睦爾撒納叛定
邊右副將軍薩喇爾自伊犁被陷復歸公聞其至吐魯番約共
進剿奏入諭嘉其甚合機宜二十一年命充參贊大臣三
月大軍再定伊犁命公駐其地籌善後事宜五月授定邊右

副將軍先是回部大小和卓木稱亂侍衛托倫泰赴葉爾羌喀什噶爾撫諭久未返公奏遣副都統阿敏道以索倫兵百厄魯特兵三千收復阿克蘇庫車烏什各回城且偵托倫泰信是月小和卓木霍集占送托倫泰還公飭阿敏道馳往招撫十月奏霍集占怙逆狀密飭阿敏道速進兵是年冬定西將軍達爾黨阿自哈薩克撤兵還厄魯特宰桑之從征者謀煽亂未發噶爾藏多爾濟詭以叛賊巴雅爾劫掠告公遣將軍和起調諸厄魯特兵協剿而噶爾藏多爾濟之姪札那噶爾布等陰通巴雅爾中途肆逆和起被害公以孤軍遠駐伊犁聞變自率千五百人東旋擊賊自濟爾哈朗轉戰而南十一月啟行戰於鄂里戰於

庫圖齊戰於達勒奇。前後殲賊數千餘。二十二年正月。至烏魯木齊。諸賊畢會。連日數十百戰。我兵無不一當百。步行冰雪。渾中履。屨不完。食瘦駝疲馬。且盡。二十二日。至特訥格。不復能衝擊。結營自固。遂被圍。時天大風雪。驛傳聲息不相聞。巴里坤辦事大臣雅爾哈善入告。詔趣侍衛圖倫楚率巴里坤兵二千。閒路馳援。以三十日至軍圍。乃解。公得新兵。復往。勦巴雅爾部落。始回巴里坤。諭曰。兆惠係伊犁辦事大臣。適遇厄魯特等背叛。卽奮往勦賊。忠勇可嘉。可封一等伯。世襲罔替。並賞御用荷包玉韉諸珍物。尋授領侍衛內大臣。戶部尚書兼都統。詔同定邊將軍成衮扎布分路剿滅厄魯特賊。取三月偕參贊。

大臣鄂實等進勦時扎那噶爾布已殺噶爾藏多爾濟等又爲
臺吉達瓦所殺而獻其首於軍門適阿睦爾撒納自哈薩克盜
馬竄歸伊犁掠扎那噶爾布牧地公檄參贊大臣富德往追
詔責公宜以專擒阿逆爲務六月奏擒獲阿逆之姪達什策楞
等七月奏擒獲巴雅爾并及其孥時哈薩克汗已畏威歸順遂
表獻馬匹八月奏言遣圖倫楚擊敗哈薩克錫喇賊眾遣愛隆
阿擊敗前掠臺站之都爾伯克臺吉納木奇降之當是時阿逆
竄入俄羅斯而遣往撫諭回城之阿敏道爲逆回霍集占所戕
九月 詔公等籌勦回部疏請於烏魯木齊屯田且便與哈薩
克市馬從之十二月成袞扎布改北路左副將軍 詔授公定

遂將軍二十三年正月復以參贊雅爾哈善爲靖逆將軍專辦
回部時各賊分四支每支各一二千伺閒出沒乃議公由博羅
布爾富德由賽里木分兩翼圍獮約相會於伊犁尋奏賊眾紛
紛逃潰狀報聞庫隴癸山者伊犁附近山也叛黨布圖庫等據
險藏匿公偵知之遣將收其牧羣而自率八十騎夜入山口剿
之時曉霧迷漫布圖庫等脫走餘悉就殲得旨獎敘四月叛
賊輝齊鄂哲特等就擒賊牧俱殘破準噶爾之事將竣疏請由
伊犁進剿回部詔與雅爾哈善會合并招降布魯特人眾尋
奏布魯特頭目人等赴軍前乞降七月遣侍衛達桑阿等先後
護布魯特東西二部使者入覲命速赴回部與雅爾哈善合

兵進勦會雅爾哈善圍庫車霍集占糾眾來援爲官軍所敗冒死入城復脫走雅爾哈善坐疏縱削職尋伏法公自請留軍以竣西事

上壯之諭嘉其奉公體國器識遠出諸臣之右賞戴雙眼花翎孔雀翎尋奏言臣抵烏克蘇降回眾五千餘口其烏什伯克霍集斯及其子漢咱帕爾亦攜眾獻城降臣遵旨令侍衛舒赫德駐阿克蘇臣卽率大軍赴葉爾羌疏入獎賜荷囊玉轡等物時兵皆未集惟領步騎四千先行留副將軍富德勒餘賊俟集大軍繼進而小和卓木已堅壁清野斂民入城使我兵無可掠又於近城東北五里掘濠築土臺欲持久困我其大和卓木

據喀什噶爾相犄角。十月初六日。師至葉爾羌陣於城東。兩翼兵先奪據其臺城。東西北三門各出精騎數百來當我。三戰三北。入城固守。不出城周十餘里。凡十二門。公以兵少不能攻。欲伺閒出奇。先營城東隔河有水草處。結壘自固。所謂黑水營也。葱嶺北河經喀城外。其南河經葉爾羌城外。土人稱北河爲赤水。南河爲黑水。故曰黑水營。公旣分兵八百使副都統愛隆阿扼喀什噶爾援路。又偵知賊牧羣在城南英奇盤山下。謀渡河取充軍寶。十三日。留兵守黑水營。親率千餘騎自東而南。甫渡四百騎。橋忽斷。城中賊出五千騎來截我兵。方奮突其陣。步賊萬餘繼之。騎賊復張兩翼圍攻我後。我隔河軍不能相救。又地

沮洳難馳騁且戰且退徒涉歸營中途爲賊隔截數隊人自爲戰自辰至酉殺賊千計而馬多陷淖亦陣亡將士百餘負創者數百公左右衝突馬中鎗斃再易明瑞亦受創總兵高天喜等俱戰沒賊復逾河來攻五晝夜我軍且戰且築壘賊亦築長圍困我十七夜公遣五卒分路赴阿克蘇告急舒赫德飛章入告賊於上游決水灌營我軍於下游溝而洩之營依樹林鎗礮如雨我軍伐樹反得鉛丸數萬以擊賊會布魯特掠喀什噶爾我軍縱火攻賊營賊疑布魯特與我軍有約大和卓木乃使人議和公執其使射書諭以必先縛獻霍集占方許納款又掘井得水掘窖得粟三閱月不困賊駭爲神先是

上念我軍久暴露將士皆勞頓於兩月前卽命靖逆將軍納木扎爾參贊三格往代並諭副都統阿里衮侍郎永貴於巴里坤豫選馬三千送庫車備調又增調索倫察哈爾兵赴之至是聞公被圍諭嘉其忠誠勇敢不避險艱晉封一等武毅謀勇公世襲罔替并賜寶石頂及四團龍補服紫纁而公不知也在圍中機愛隆阿率兵還阿克蘇催援軍途遇靖逆將軍以二百餘騎徑進止之不可復遇害富德在北路聞黑水圍急卽率兵三千餘冒雪赴援二十四年正月六日次呼爾璦遇賊五千騎且鬪且前轉戰四晝夜沙蹟乏水齒冰救渴又乏馬半步行九日渡葉爾羌河距黑水營尙三百里賊愈聚不能進兩軍皆

被圍萬里外。適阿里亥以巴里坤兵六百解馬二千駝一千合。愛隆阿兵千餘夜至遙望火光十餘里。知官軍與賊相持處也。又途遇我往劫營之卒。知望援孔急。卽橫張兩翼大呼馳薄聲塵合。杳直壓賊壘。與富德兵三路奮蹙。賊黑夜不知官兵若干。萬自相格殺潰遁。我師遂長驅進。未至黑水營數十里。又擊敗之。公見圍賊日少。又遙聞鎗礮聲塵大起。從東來而營中所掘井忽。智知援軍已集。卽勒兵潰圍殺千餘級。盡燔其壘。賊大敗。入城兩軍會合振旅還阿克蘇。公奏言臣等自上年十月十三日被圍相持三閱月。仰賴

聖主威福。

上天神佑靈蹟甚多安營處近戈壁而有深林伐木給用內拾鉛丸數萬卽用以還擊初憂乏水因賊灌營反獲接濟尋掘井泉隨涌出至正月初旬井水忽涸又獲藏粟二十餘窖官兵意氣奮發毫無懼色正月十四日與富德合兵而還疏入。

上嘉獎御製詩賜之又製黑水行長句書其事公疏辭封

爵及章服弗許並以公母年高遣使存問是時霍集占黨窺

和闐命速發兵援之六月大兵分路進剿霍集占棄葉爾羌

遁降其眾四萬餘戶撫定之捷聞璽書褒美命速追捕兩

賊酋七月大敗霍集占於阿爾楚爾等處逆酋兄弟竄巴達克

山我軍蹙之勒令擒獻未幾均被戮十月巴達克山汗素勒坦

阿獻霍集占首其安集延諸部皆相率歸順回疆平詔曰將軍兆惠等凱旋至京時朕當親臨郊勞兆惠已封公爵并迭賜章服其加賞宗室公品級鞍轡以示寵異再加授一子爲三等侍衛十一月奏定葉爾羌喀什噶爾英噶薩爾烏什阿克蘇等城駐兵章程並請令各城伯克分番入覲從之二十五年二月授御前大臣賜紫禁城騎馬初

上命築壇設齋於良鄉城南行郊勞禮至是公率將士凱旋上親拜天將軍以下皆甲冑王公大臣隨行禮畢上御黃幄將軍等抱膝跪見如儀

上撫勞賜御用朝珠及馬禮成隨駕還京

上御豐澤園幄次凱宴資銀幣 命圖形紫光閣

上親製贊明年授協辦大學士兼管刑部尙書事八月 命同

大學士劉公統勳赴豫勘築楊橋等處決口奏濬賈魯河定開

放各事宜二十七年復同劉公勘江南運河酌濬高寶諸湖歸

江之路二十八年 命勘直隸海口并相度天津靜海文安等

處疏濬事宜加太子太保復奉 命會同江督尹繼善公籌濬

荆山橋河道二十九年順勘直隸河工還朝十一月薨

上親臨其第酌酒即以其子札薩泰許尙公主 御製詩悼之

晉贈太保入祀賢良祠 賞內庫銀五千兩遣侍郎畱保等經

理喪事 賜祭 賜葬諡文襄三十年

上南巡至良鄉見郊勞臺賦詩志悼四十四年御製懷舊詩
列公於五功臣中子扎蘭泰尙和碩和恪公主授和碩額駙襲
一等公兼散秩大臣

勵文恪公事畧 子文恭公廷儀 孫宗萬

公諱杜訥字近公直隸靜海人初以杜姓爲生員學問淵通精楷法康熙二年纂

世祖實錄詔選善書之士公試第一書成議敘授福甯州州同命畱南書房行走食六品俸舉博學鴻詞科未中選會殿門易額敕翰林官書禁扁皆不稱旨惟公書報可十九年優敘內廷講官學士葉方藹等特旨授公編修充日講起居注官二十一年復勵姓二十四年

上命日侍點閱通鑑二十五年與學士張公英同侍點閱綱目全編十二月以御批通鑑綱目竣疏言

皇上點閱載籍無閒寒暑卽巡幸駐蹕命臣等捧簡進閱一如禁廷每評論古帝王政治得失文武張弛及人才進退邪正消長與夫諸儒舊說之聚訟紛紜者親加剖決悉歸至當請頒發

聖諭宣示史館以發涑水所未詳補紫陽之弗逮得旨下禮部翰林院會議如所請累遷贊善侍講改光祿少卿遷通政司叅議太僕卿宗人府丞三十九年遷左副都御史疏言督撫大吏朝廷畀以百餘城吏治數千里民生任至重也若託詞鎮靜漸成悠忽殊忝封疆之寄請敕諸督撫將察吏安民興利除弊諸實蹟年終彙奏以備清覽如開注不實治以欺罔罪

庶諸臣時時警勉不敢貽誤地方其所轄之藩臬二司專掌錢穀刑名有無虧空及有無駁審宜令詳悉并列庶藩臬之優劣亦無遁情又疏言提鎮保送將弁時有騎射甚劣并年老之員屢經特旨甄別請敕下兵部將引見不稱旨之員彙冊進呈酌定處分庶提鎮咸知謹凜而將備亦難尸素苟容疎均下部議行四十二年擢刑部右侍郎十月薨於任年七十有六賜卹如例特旨給全葬後二年

上駐蹕靜海諭曰原任侍郎勵杜誦向在南書房效力二十餘年勤勞無過應予諡御書文恪二字賜其家雍正元年追贈禮部尚書八年入祀賢良祠

純皇帝御極。加贈太子太傅。公以諱生。膺殊遇。出入禁闥。數十年。小心慎密。前後疏奏。多所建白。居憲職。詳讞刑獄。無所瞻徇。朝野推爲正人。子廷儀。康熙三十九年進士。選庶吉士。明年丁母憂。又明年。特命直南書房。四十三年。授編修。尋充日講起居注官。累遷中允。侍講學士。擢內閣學士。經筵講官。掌院學士。晉兵部右侍郎。兼掌院如故。雍正元年。擢刑部尙書。疏言各省常平倉米穀。雖有府司道盤查。難保無徇隱弊。當責成督撫。覈實存倉。委幹員不時盤查。年終造冊題報。督撫離任。將冊籍交新任。詳覈虧空題參。新任徇隱者罪之。部議如所請。又疏言古北口外命案。向由本處武職詳解。刑部派司員往驗。路經數百

里往返需時。傷痕已變。審擬難確。請於口外適中處設理事同知一。遇民間命案。驗明取供。詳解題結。盜案亦如之。其稱職者。照捕盜同知例卽陞。從之。二年。奏請團練民壯。每州縣選五十名。分習鎗箭。於州縣俸工內酌給工食。勤加訓練。得旨。此奏甚善。著直省督撫實心奉行。三年。疏言監禁宜分內外。內監以居要犯。外監以居輕犯。其女監另牆隔別。庶防範嚴肅。不致串供。部如所議。五年。典會試。尋坐濫保屬寮。降二級奉旨。畱任。又坐讞獄罪名錯誤。議革任。得旨。寬免。六年。疏陳考職積弊四條。又疏陳禁止私鹽四條。又疏陳清查入官家產弊端四條。俱下部議行。七年。加太子少傅。賜矜愼平恕額。請嚴廢錢私。

運近邊近海地方之禁從之尋遷吏部尙書仍專管刑部事十年夏以病乞休

上慰留之閏五月薨遺疏入得旨勵廷儀侍直內廷蒙

聖祖知遇之恩教養有素伊父尙書勵杜訥老成端謹學問優長朕幼年在宮中謔書時資其講論至今念之不忘朕御極之初擢勵廷儀爲司寇晉秩冢宰數年以來勤慎小心今聞謫逝深爲傷悼已命大學士往奠茶酒其更議卹典尋賜祭葬如禮謚文恭子宗萬康熙六十年進士選庶吉士授編修入直南書房前後三次坐事落職均奉特旨起用命在南書房行走者一在武英殿行走者二在懋勤殿行走者一累官至刑部

待郎勵氏父子孫三世皆掌邦禁爲正亞卿又皆直南書房充
日講官知起居注數厯清要在官皆有名績海內榮之

史文靖公事畧

溧陽相國史公十歲能詩十八舉順天鄉試十九登康熙三十
九年進士入翰林乞假歸娶朝野榮之後六十年當乾隆庚辰
科再宴瓊林士之雋南宮者公與執同年禮 諭稱爲昇平人
瑞 御製詩褒美寵爲科名盛事公由甲第迄大拜在外督撫
八行省內周歷六官首尾居相位垂二十載名注 朝籍總六
十有四年恭遇

慈寧大慶入九老會班次諸王下圖形 內府 賜詩以比富
鄭公文潞公中年總督兩江開府鄉里具疏再辭 詔弗允
殊恩異數罔有倫比厥由 國家重熙襲慶以有耆龐魁艾之

重臣亦惟公。瓊猷偉抱宣。昭世德乃克。欽承。

三朝之眷命。可謂盛矣。公諱貽直。字儼絃。號鐵崖。先世壯侯。崇封於溧陽。遂家焉。世爲江南舊望。祖鶴齡。官編修。父夔。官詹事。公幼承家學。嫻掌故。凡內外銓之利弊。金穀之登耗。刑名兵屯之得失。綜貫靡遺。由檢討典試雲南。督廣東學政。遷贊善。累遷侍講學士。雍正元年。命直南書房。擢署吏部侍郎。尋授內閣學士。遷吏部左侍郎。

世宗賜詩。有形墀迹躡中臺履。玉佩聲含曉殿風之句。二年充經筵講官。典會試。三年調工部。兼理戶部侍郎事。五年再典會試。謫戶部。兼理吏工二部侍郎事。尋管順天府尹。六年轉吏部。

左侍郎仍兼戶部右侍郎。七年署福建總督。八年夏調署兩江總督。尋授左都御史。仍署總督。請以江甯府屬之溧陽縣改隸鎮江府。從之。九年還朝。兼理吏部戶部事。時大軍征準噶爾。陝甘二省辦理軍需。命偕侍郎杭奕祿等前往宣諭化導。協理陝西巡撫事。尋擢兵部尚書。仍留陝西當是時。

憲皇帝詔各督撫舉材武之士得數千人。號勇健軍。其最者能開弓二十石。舉刀千斤。特命公帥屯巴里坤。以資策應。十年署巡撫。尋調戶部尚書。總理陝西巡撫事。十三年還朝。條上三事。一科道吏禮部宜用正途。一遷擢宜循資格。抑躁進。一河南開墾捐輸宜速罷。又言國家理財有正。經勸捐非體。不可令於

下皆得旨允行。尋署湖廣總督。乾隆二年召還京。三年調工部尚書。尋調刑部。五年兼理兵部事。未幾調兵部尚書。教習庶吉士。御製五言律詩賜之。七年遷吏部尚書。署直隸總督。協辦大學士。九年拜文淵閣大學士。命紫禁城騎馬。十年典會試。加太子太保。十三年坐票簽錯擬奪職。畱任。十四年兼理工部事。十五年兼理刑部。十八年兼理吏部。二十年次子奕昂署甘肅布政使。公會以書屬巡撫鄂昌事聞。以原品休致。二十二年。

高宗南巡。迎駕沂州。命在籍食俸。賜御製詩。遂召補大學士。入閣辦事。六月。

上聞公中途患病遣侍衛某帶同御醫馳驛前往診視七月至京兼理工部事加太子太傅充經筵講官二十五年值會試週甲之年拜賜詩有旨大學士史貽直年已八旬嗣後凡遇祀典不必隨班行禮復賜御詩一章二十七年請老優詔慰留許解工部事務示體恤仍命每年賞飯銀五百兩嚴寒盛暑無入閣二十八年三子奕壞以瀝安守引見特命留京補四品堂上官俾得侍養五月薨於位年八十有三上臨軒軫悼詔皇六子臨喪奠醢贈太保入祀京師賢良祠賜白金二千兩治喪尋賜祭葬諡文靖公生有幹局神識超駿雍正初大將軍年羹堯平青海歸勢張甚黃縉紫騮絕

馳道而行。王公以下屈膝郊迎。年過目不平視。獨公長揖。年望見驚異。遽翻鞍下曰。是吾同年鐵崖耶。扶上已所乘馬而已。易他馬並轡入國門。後年以罪誅。窮治黨與。

世宗問汝亦羹堯所薦乎。公免冠應聲曰。薦臣者羹堯用臣者皇上。

上領之。公之爲閩督也。弁兵舊戍臺灣。受代歸過番社。輒橫索供頓。鎮臣以非所轄。際弗問。公改委臺鎮。本標押送。弊遂絕。福興漳泉四郡地頻海。貯穀易敗。公以臺灣有應碾運內地。平糶米請易穀分貯各倉。卽碾倉穀給兵食。推陳易新。兵民兩便之。著爲例。兩江殷劇號難治。公以鄉人權節制。杜絕瞻徇。所部肅

然。西安有屯戶籍均內地。而故事獨輸本色米支兵餉。往往苦貴。輟公用軍需餘穀十六萬石。爲置常平倉。俾借領如例。後皆以爲法。

高宗御極。公以舊臣入覲。伏謁梓宮。賜

世宗所遺鶯黃蟒衣。四圍龍補服。曰。此

先帝意也。今朕君臣所共事。卽

先帝事也。卿其始終一節。公感謝。嗚嗚。

上亦泣下不止。尋總督湖廣苗匪屢竊發。蒲寅三鳳老一狙獫爲渠魁。公至簡軍實嚴守備。侍芻廩。若無暇。爲翦滅計。一日密檄鎮將提勁兵二千入山。勦捕。蒲鳳就擒。黨惡者無遺種。或問

公。公。曰。吾。前。故。遲。之。使。不。爲。鋌。走。備。且。密。審。其。山。川。扼。塞。及。栖。遁。所。由。也。容。美。土。司。稅。輕。改。流。後。額。日。增。公。請。仍。征。原。額。獠。猺。懽。呼。修。武。昌。城。外。江。隄。及。洞。庭。湖。之。柁。桿。洲。疏。陳。善。後。五。事。增。設。救。生。船。督。直。隸。未。半。年。所。題。結。事。九。千。六。百。有。奇。入。爲。正。卿。遇。廷。議。公。徐。出。一。言。洞。中。肯。綮。九。列。更。事。無。出。公。右。者。常。言。天。下。辦。事。人。多。解。事。人。少。深。刻。非。明。縱。弛。非。寬。交。際。非。私。協。恭。非。黨。故。公。立。身。行。政。無。心。寬。猛。恥。矜。苛。廉。一。以。持。大。體。安。社。稷。爲。務。凡。疆。吏。以。疑。獄。告。屢。命。公。馳。傳。往。勘。多。得。實。稱。旨。上。蔡。令。張。球。誣。陷。同。官。邵。言。綸。總。督。田。文。鏡。庇。之。

世宗命公往豫案覆發其奸田大憝大學士邁柱請疏湖廣荆

子闢至陝西龍駒寨河道爲運米計公力持不可事遂寢漸督
李衛約爲兄弟公以其不學也謝之三人方枘用時搜其鋒者
皆懾公獨棘棘不阿其守正如此在政府持大體不屑矯激自
別異時準夷回部以次削平拓疆二萬里公勗贊機務每召
對移晷乃出所敷奏雖子弟莫得聞其再相也年近八旬特
旨許肩輿入省每湯沐賜賚不絕偶示疾御醫絡繹踵至
嘗奏事拜起舒緩

上問卿老憊乎公曰

皇上到臣年當自知之

上大笑時公年八十一矣公清標玉立眉目如畫韓塵不沾衣

圭襖褶式皆內裁好獎植士類而不使其人知屢主禮部試名
公卿多出其門與後進言無不盡語多譬引饒風趣他大臣或
懼言溫室樹隱情惜己公肆意逞詞談啁流連忌者亦莫能中
也子三奕簪官贊善奕昂官至兵部侍郎其次卽奕瓌

沈端恪公事畧

國朝眞儒輩出。平正切實。力宗紫陽。推平湖陸清獻公爲最。而錢塘沈端恪公則篤信平湖以上宗朱子者也。公於平湖之書。沈潛反覆最久。嘗倣近思錄之例。薈萃諸說而類編之。凡十有四卷。曰陸子遺書。其爲治則壹以嘉定靈壽之政爲法。及長御史昌言偉論。亦與清獻在臺時同。所自著曰夙興錄。曰讀論語隅見錄。研理窮事。皆誦法陸子。學者由此而得梯航。宗平湖以上宗朱子。濂洛關閩之正脈。無復有掘泥而揚波者矣。公諱近思。字位山。號開齋。世居仁和五杭村。先世皆力農。公生九歲而孤。家貧。隨仲兄遊學靈隱寺。有借巢老人者。資之讀儒書。負笈

虞山錢圓沙嚴寶成之門。既歸家。補諸生。讀宋五子書。刻苦勵志。書程子涵養須用敬。進學在致知二語於座右。嘗自言其得力曰。吾由濂洛關閩之書。上溯孔顏曾孟之心。怡然渙然。若合符契。不自知其手舞足蹈也。康熙三十八年。舉於鄉。明年成進士。亟返里門。理故業。選期已過。顧以學未成。不出也。久之。授臨潁縣知縣。單車就官。謝請託。卻饋遺。謹號令。禁科派。四十八年大水。請發粟以賑。全活無算。明年大熟。建社倉七所。設義冢。收瘞枯骨。捐俸葺潁城。潁與許州接壤。有孔家口水。勢衝突。爲潁患。公出。夫助許築堤。患遂絕。建岳忠武于忠肅祠。修宋統制楊再興墓。立紫陽書院。爲學規。教士以誠敬。專一爲宗。縣西葛岡。

村俗甚惡。公創義學。延師訓童子。手定程簿爲期。使之來自覈其課。及期。刺童數十人。父母皆爲製衣冠。坐牛車聯翩赴縣廨。公按程簿覈其勤惰。而加賞罰焉。經旬復來。逾年。子弟皆向學。其長者日馴。遜早納租稅。恥爭訟。公又買田以歲入給師膳薪。使久而無廢。洎潁七年。膺卓薦以去。士民攀車灑泣。不得行。擢南甯同知。引疾歸。教授生徒。布衣蔬食。泊如也。朱高安相國撫浙時。特疏薦公。

聖祖召入京。監督本裕倉。會臺灣用兵。總督滿保公請於朝。以知府揀發福建。公作遠慮論四篇。大指以臺灣宜析爲縣。每縣各分都圖保甲。易於稽察。又取民壯拔置行伍。以充各標。其餘

流民必審其原籍乃授田。當時採用之海疆底定。雍正元年召授吏部文選司郎中。特加二級。賜第一所。帑金四百兩。時銓法久敝。胥吏因緣爲姦。公夙夜勤慎。有姦輒發。吏不敢欺。九月充會試同考官。旋晉太僕卿。仍兼理文選司事。二年典山東鄉試。超授吏部右侍郎。賜詩有操比寒潭潔。心同皎月明之句。公每奏對。必齋戒。越宿志氣恪恭。於育才用人尤兢兢焉。七月命同尚書阿爾松阿往河南勘獄。十月典武會試。三年吏部議年羹堯罪。

上責其含混。尚書隆科多削太保。公等坐附和降調。得旨寬免。四年三月轉左。七月典江南鄉試。

上以公出題正大不尙詭僻策問發揮性理具於本原以此試
士實有裨於人品學術命議敘加二級時查兩庭汪景祺俱
以悖逆誅公與同籍因疏言浙省遠處海濱忝靡澆薄以詭詐
爲能以忠厚爲拙以勢利爲重以廉恥爲輕以逢迎奔競爲有
才以安分守己爲無用以請託徇私爲多情以孤介剛方爲刻
薄以健訟打降爲豪傑以捏詞造謗爲智謀風俗人心頹壞已
極如兩庭景祺之大逆不道越水增羞吳山蒙恥蒙簡儒臣爲
觀風整俗使滌除邪穢咸與維新謹陳浙省舊弊凡十事一童
生初應縣府試卽請託勢要求開公摺府縣官憑以錄取最爲
惡習請懲創以端始進一生員初得一衿便思鑽營當事不得

則編造浮言。得則造謁顯貴。求通關節。請將本人治罪外。其私書關通者。並罪之一。在籍鄉紳。多向地方官關說公事。顛倒是非。請分別治罪。一生員妄借條陳名色。向有司呈告地方公事。藉以欺壓愚民。武斷鄉曲。請褫革治罪。一奸徒造作揭帖。攻發陰私。汚人名節。或捏貪酷款蹟。誣玷官長。或編德政歌謠。聳動聽聞。以致上官談信。賢否混淆。請照光棍律治罪。一士人刊刻誨淫誨盜之書。大爲心術害。請毀板重懲。一訟師盤踞城市。遇有口角是非。教唆興訟。甚者串通胥役。挾持官長。請於保甲內將無籍之徒。嚴加查察。如遇訟師。立予懲治。一浙省衙役過多。每衙門動皆數百人。勾通紳棍。魚肉小民。請飭大小各衙門。遵

照經制役額一切白役幫差盡行革退其稔惡不法者實重典一士紳犯賭法所必懲而豪家暗養打降之人船埠橋埠各有棍徒雄霸欺凌寡弱請嚴治首從一民間演戲原屬豐年報賽之常浙省有坐方地棍借端科斂糾黨勒索應重懲又如雲林天竺各寺廟每春時婦女遊觀輕薄士子呼朋引類混雜嘲笑毫無忌憚宜嚴禁得 旨所陳風俗十事切中情弊著照所請嚴行禁約浙省有沈近思一人不爲習俗所染可謂上智不移足盡洗越水吳山之羞恥矣五年 特擢左都御史仍兼管吏部事與會試教習庶吉士公自縣令起家洞悉閭閻疾苦凡事關創革必熟籌其利弊有益民生而後已嘗廷議耗羨歸公時

嘗力爭以爲不可。眾皆驚愕。弗爲動。

聖主鑒其誠。亦不之罪也。是年十二月十三日。無疾而終。

上聞震悼。賜帑金五百兩治喪。命吏部派司官料理後事。

諭嘉公人品端方。持躬廉潔。遣平郡王率散秩大臣奠爵。加禮

部尙書。太子太傅。廕一子入監讀書。賜祭葬如禮。予諡端

恪。生平立心坦易。非道義一介不取。窮達夷險。不以二其心。爲

文樸實說理。類南宋大家。有天鑒堂文集在。朝與蔡文勤。公安

最篤閒。以事至海。淀必宿。文勤所而雷翠庭鉉亦與時講論。所

輯平湖遺書。嘗屬翠庭校訂焉。性靜默。不妄言笑。至其辨學術。

陽儒陰釋之歧途。世道人心。義利公私。忠佞賢奸之分界。則如

決百川而東注洋洋灑灑不能自已高安相國雅重公哭其喪
爲表墓曰理學名臣公卒年年五十有七子玉璉尙幼詔地
方官加意照料撫養俟成立時送部引見乾隆十一年授桂林
府同知

蔣文肅公事畧

子文恪公溥

蔣公諱廷錫字揚孫號西谷一號南沙江蘇常熟人父諱伊字渭公康熙十二年進士選庶吉士甫釋褐卽具疏上所著玉衡臣鑒二錄玉衡者言君道臣鑒者言臣道采唐虞及元明事蹟以備法戒昭勸懲爲卷二十有四得旨畱覽散館授御史時南方用兵城邑殘破疏請責成有司招徠開墾課戶田爲殿最又以奸民挾仇動借叛逆以陷良善請嚴反坐律又以時方開捐例選途頗壅乃繪十二圖上之曰難民曰刑獄曰讀書曰春耕夏耘曰催科曰鬻兒曰水災曰旱災曰觀榜曰廢書曰暴關曰疲驛復疏陳難民狀言臣於十五年請假回里見難民千百

爲羣哀求取贖。此等被掠之人。並擄之深山村落。初非得自賊營。其爲誣陷何疑。請嚴禁將弁掠賣男婦。所過地方。敕督撫一面截留。一面參劾。其論銓法云。捐納知縣。原出一時權宜。其人未必無賢能。而不可不加選擇。請未選者。責成吏部。試以身言書判。優者按次除授。劣者給縣銜。俾爲佐貳。其已選者。責成督撫。一年之中。試其才守。行保舉法。否者斥之。並請將見開捐納知縣例。亟行停止。

聖祖覽圖及疏。爲動容嗟嘆。又疏劾江西巡撫董衛國。縱兵焚掠。及擅役民夫狀。詔衛國軍前帶罪圖功。十八年。因地震。疏論六部積習。遇有銷算案件。要求貨賂。意爲高下。堂司書吏連

爲一手請嚴加飭禁。又言災眚迭見。乘輿不宜輕出。宜日御便殿。咨諏治道。以飭官常。求民瘼。時江南江西游饑。上救荒策。大指謂賑濟之法。莫善於分。莫不善於聚。縣各爲賑。勿聚於府。鄉各爲賑。勿聚於城。人各爲賑。勿委於吏。臣於康熙十年。曾賑荒於鄉。設廠三所。活者多。所耗者少。域中設官廠二所。活者少。所耗者多。此其明驗也。又其目在獎廉吏。緩催科。通商賈。興工作。養孤老。埋骼。爲五疏上之。先是閩逆之變。禁兵駐蘇城。以供調遣。人皆苦其騷。公疏言。內地不必防禦。以身家力保無他虞。得撤回。郡人德之。二十一年。授廣東糧儲參議。革耗羨。禁餽獻。除差徭。日買乾魚。自給。誓不取民間一物。集諸生講業。書

院及諸義塾。月有會。旬有課。人爭向學會。詔求學行兼優者。充督學。任九卿舉公以應。遂遷河南提學副使。既至。頒示教條。崇實學。正文體。其孝子貞婦。旌之。營求請託者。罪之。二十六年。卒於官。年五十七。子二。長陳錫。康熙二十四年進士。由富平知縣累官雲貴總督。其次卽公也。公少有學行。由舉人供奉內廷。康熙四十二年。詔舉人江灝。何焯。蔣廷錫。學問皆優。可一體殿試。賜進士。選庶吉士。明年。未散館。授編修。歷遷贊善。侍講。侍讀。庶子。少詹事。五十六年。擢內閣學士。充經筵講官。雍正元年。遷禮部右侍郎。仍兼學士。賜詩有在。公勤夙夜。懋績有賢聲之句。二年。疏請續纂會典。卽命爲副總裁。調戶部侍郎。

三年 命與內務府總管來保察閱京倉覆奏開溝墊土添橋架木各事宜 詔皆如議尋疏言漕運全資水利宜通源節流以濟運道一曰濬泉源山東漕河資汶泗洸之水而四水源皆微細全賴泉源助成巨流計一省之泉百有八十其派有五分水魯橋天井新河沂水是也其委同出一道謂之泉河口舊設管泉分司今雖裁仍設泉夫請飭有泉州縣督率疏濬盜遏者有禁又濬兗二府爲濟水伏流之地若廣爲疏濬則散湮砂礫閒者隨地涌見應立法勸泉夫濬出新泉優賚銀米歲終冊報卽以是爲州縣課最一曰開湖地山東諸泉所匯爲湖十有五各建長礎設斗門爲減水壩以時啟閉漕河溢則減漕以入湖

湖水溢則啟湖以濟漕。故諸湖名曰水櫃。其後居民壅水占種斗門。開壩遂漸圯塞。多生芟草。積沙處高與漕河堤等。蓄洩無所。請察勘未耕之地。就低處悉行挑深。以復水櫃之法。就挑出之土築堤以束水櫃。每湖開支河以承諸泉之入。益漕水之流。復建閘以時濺放。庶蓄洩得宜。一曰嚴築壩。開壩日期山東運河歲以十月初築壩通流。分洩諸湖。候來春二月冰泮開壩受水。法至善也。但日久玩生。築壩每在十一月中未免過遲。開壩每在正月初旬未免太早。請飭所司築必以十月望前開必以二月庶河水充盈。漕運商船皆利。一曰修築坎河灘壩。山東運河惟賴汶水一派。分流南北濟運。明宣德時築戴村壩於汶水

南以遏汶水入洸建坎河石壩於汶水北以節汶水歸海其後復堆積石灘水溢則縱之歸海水平則畱之入湖嗣雖歲有修築但日久頽廢萬一汶水北注挾湖水盡歸大清河則四百餘里之運道所關非細請敕總河及巡撫相度形勢修復舊石灘改建滾水石壩以資蓄洩

上令閣學何公國宗等攜儀器輿圖同總河齊蘇勒公巡撫陳公世倌履勘均應如公議奏下九卿議行四年遷戶部尚書典順天鄉試兼管兵部尚書十二月丁母憂優詔軫恤特遣大臣賜奠加恩諭祭一次給一品太夫人封誥賜銀千兩治喪命公在任守制固辭不許給假數月扶櫬歸葬事畢來

京六年三月授文華殿大學士兼理戶部充實錄館總裁七年。賜第一區。賜額曰鈞衡碩輔。加太子太傅八年。典會試。命同果親王允禮總理三庫事務。十月。諭嘉公與大學士張公廷玉等贊畫忠勤。賜一等輕車都尉。十年閏五月薨於位。年六十有四。遺疏入。諭部曰大學士蔣廷錫受。

聖祖皇帝知遇之恩。直內廷二十餘載。自朕卽位。由學士游擢大學士。才識優長。經猷明練。倚賴方殷。今夏忽患痰癰。每日兩次。以疾狀奏聞。方期宿疾有瘳。豈料溘然長逝。朕心傷悼。可輟朝一日。其所用棺殮之屬。俱頒自內府。尋命內大臣率領侍衛奠茶酒。賜祭葬。并加祭一壇。予諡文肅公。以文學受。

兩朝特達之知。出入禁闥。恪慎勤勞。未嘗一日去。
上左右。隨同怡賢親王。辦理戶部事務。秉公執正。釐剔弊端。甚
晰。吏不能爲奸。及參贊機務。續密周詳。雖子弟門人。不能探其
崖畧。故可紀者。止於此少工詩善畫。花卉多用逸筆。寫生點綴
坡石。無不超絕。

聖祖嘗臨視之。性豪爽。周恤親舊。不少吝。賜第外。田宅無所
增。著有青桐軒諸集。乾隆元年入祀鄉賢祠。長子溥能繼其武。
溥字質甫。號恆軒。生有異秉。十三歲時。

世宗召見。奇之。雍正七年。欽賜舉人。八年成進士。選庶吉士。
上親擢爲第四文肅公。叩首辭讓。

上曰朕從未見爾子筆跡暗中衡鑒毋庸辭也卽命直南書房會賜文肅公一等輕車都尉並命公承襲十年父憂歸旣葬諭卽來京供職十一年授編修累遷侍讀左庶子充日講起居注官乾隆元年晉侍講學士四年擢閣學尋授吏部侍郎六年

上慮各省督撫尙有積習未除者命大學士九卿畱心訪奏公密陳所聞各條一督撫各立門戶引用私人公事從此推諉又或外託和衷營私瞻徇姑容不職屬員貽患地方一督撫新任必極言前任廢弛地方凋敝爲日後卸過地並見己之振作或前任升遷者則曲爲彌縫擯棄者更吹索其瑕類一參劾屬

員定例督參撫審撫參督審而承審各員惟視聲勢爲轉移如原參者已失勢則巧爲開脫或見任或要津必附會煅煉督撫亦瞻顧不問一督撫意旨易爲屬員窺伺逢迎如昔年河南墾荒陝西開井祇以迎合上官致奉行不善爲民累疏入

上多採納敕各督撫毋蹈前轍焉是年典試浙江兼署刑部左侍郎七年充經筵講官疏言凡條奏發九卿會議由主稿者酌定或准或駁會議日書吏誦稿一遍以待公問但其中原委曲折一時未能周知請於定議前兩日將議稿傳鈔俾各詳勘至當然後可剖析暢言下部議行八年夏授湖南巡撫御製詩賜之九年疏言永順一府及辰州府屬之永綏鳳凰乾州三

屬苗民貪暴之習未除。至寶慶府之城步靖州之綏甯。苗崗狡惡者尤多。臣宣布天恩。嚴禁兵役擾累。仍整飭武備。不得懈弛。苗民漸知守法。手敕報曰。御苗之道。首以不擾爲要。次則使知兵威之不敢犯。此奏頗得之矣。又奏同學臣甄別教職衰頽荒疏者十三員。咨部罷黜。

上是之。以各省督撫多姑息。下其奏令公閱。先是給事中胡定奏湖南濱湖荒土。宜勸民修築開墾。部議令巡撫查奏。至是公疏言湖濱淤地。築壘殆遍。束奔湍爲細流。洲渚遍加堵截。常有湖水衝決之患。見在沅江之萬子湖。土民呈請築壘。臣親往勘。廣袤八十里。四面受水。費大難築。並於上下游水利有礙。臣以

湖地墾築已多當防湖患不可有意勸墾

上題其言十年授吏部右侍郎軍機大臣十三年充會試副考官擢戶部尚書十五年晉太子少保兼管三庫事十八年協辦大學士兼禮部尚書掌翰林院事十九年命偕汪公由敦董公邦達修盤山新志盤山在蘇州向沿譌謂韓愈送李愿歸盤谷卽其地而不知盤谷實在濟源

上特爲考證以正謬公善寫生得文肅公遺法每進呈多蒙御題有師承家法披圖見右相丹青有後生之句二十年兼署吏部尚書二十四年拜東閣大學士兼管戶部事二十五年典會試先是公弟洲在山西布政使任內以罪誅其無著帑項公

奏懇公年代交至是 特旨寬免二十六年薨年五十有四
諭稱六居心純正奉職克勤久直內廷敬慎小心從無少懈特
贈太子太保入祀賢良祠 命照前大學士蔣廷錫例柩歸時
凡文武官在二十里內者俱向靈前致奠方公之病也
上親往視 慰諭有加及卒復 親臨奠醊並 賞銀二千兩
治喪尋 賜祭葬如典諡文恪子六人櫟由編修官至兵部侍郎
郎賜棨由貢生捐知府歷官戶部侍郎兼管順天府尹襲輕車
都尉賜棨子繼勳官至河南布政使